



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 512/16 prot.

Tiranë, më 26.10.2023

VENDIM

Nr. 1028, Datë 26.10.2023

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË ABO WIND WP FLECHTDORF GMBH & CO. KG NGA SK WIND GMBH & CO. KG.”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 26.10.2023, shqyrtoi çështjen me:

Objekti: Autorizimi i përqendrimit të realizuar nëpërmjet përfutimit të kontrollit të shoqërisë ABO Wind WP Flechtdorf GmbH & Co. KG nga SK Wind GmbH & Co. KG.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet përfutimit të kontrollit të shoqërisë ABO Wind WP Flechtdorf GmbH & Co. KG nga shoqëria SK Wind GmbH & Co. KG,

VËREN SE :

I. Palët në transaksion dhe procedura

Pranë Autoritetit të Konkurrencës, u depozitua njoftimi mbi përfutimin e kontrollit të shoqërisë ABO Wind WP Flechtdorf GmbH & Co. KG nga shoqëria SK Wind GmbH & Co. KG, njoftim

i cili është depozituar jashtë afatit 30 ditor nga lidhja e marrëveshjes, duke mos plotësuar kriteret e nenit 12, pika 2, të ligjit nr. 9121, datë 28.07.2003 “Për mbrojtjen e konkurrencës”.

Referuar “Marrëveshjes për blerjen dhe transferimin e aksioneve”, palët pjesëmarrëse në transaksion janë:

Pala blerëse: SK Wind GmbH & Co. KG është një shoqëri me përgjegjësi të kufizuar, e themeluar sipas legjislacionit të Gjermanisë . Shoqëria është aktive në menaxhimi i aseteve dhe të gjitha aktiviteteve që lidhen drejtpërdrejt ose tërthorazi me to, në veçanti me funksionimin e fermave të erës në Gjermani dhe Francë.

Shoqëria SK Wind GmbH & Co. KG zotërohet 100% nga Statkraft Holding Wind & Solar Deutschland GmbH dhe kjo e fundit zotërohet nga shoqëria Statkraft Germany GmbH, me seli në Düsseldorf, Gjermani. Të gjitha shoqëritë janë pjesë e Statkraft Group, ku Statkraft AS është shoqëria mëmë e tyre dhe zotërohet tërësisht nga Statkraft SF.

Grupi Statkraft është lider në sektorin e hidroenergjisë dhe aktori më i madh i hidroenergjisë së rinovueshme në Evropë.

Grupi Statkraft është i pranishëm në Shqipëri, nëpërmjet filialeve të zotëruara tërësisht nga shoqëria Statkraft Markets B.V:

Statkraft Renewables Albania SHPK, është një shoqëri me përgjegjësi të kufizuar, e themeluar në datë _____, me objekt: veprimtari studimi, projektimi, ndërtimi, operimi dhe administrimi i impianteve fotovoltaike dhe i sistemeve të lidhura me to, për prodhimin e energjisë nga dielli, riparimi i tyre si dhe mirëmbajtja dhe mbështetja teknike etj.

Devoll Hydropower SHA, është një shoqëri aksionare e themeluar më datë _____, me objekt: planifikimi, ndërtimi, mirëmbajtja dhe funksionimi i tre njësive prodhuese hidroelektrike me një kapacitet të kombinuar të instaluar përafërsisht 319 MW në Luginën e Devollit, përafërsisht midis lartësive 806 dhe 95 metra mbi nivelin e detit si edhe shitja e elektricitetit të prodhuar në Shqipëri dhe jashtë saj.

Pala shitëse: ABO Wind Aktiengesellschaft është një shoqëri publike, e regjistruar sipas legjislacionit Gjerman. Objekti i shoqërisë është fillimi, konsultimi, planifikimi, zhvillimi, funksionimi dhe menaxhimi në lidhje me projektet që kontribuojnë në një furnizim miqësor me mjedisin, veçanërisht përdorimin e energjisë së erës, tregtimin e impianteve të prodhimit të energjisë dhe vendndodhjet për impiantet e prodhimit të energjisë.

Shoqëria Target: ABO Wind WP Flechtdorf GmbH & Co. KG është një shoqëri me përgjegjësi të kufizuar, e themeluar sipas legjislacionit të Gjermanisë. Objektivi kryesor i shoqërisë është realizimi i Flechtdorf përmes planifikimit, ndërtimit dhe funksionimit të turbinave të reja me erë.

Shoqëria B&F Windpark GmbH, është një shoqëri me përgjegjësi të kufizuar e regjistruar sipas legjislacionit gjerman.

Shoqëria target është një shoqëri projekt (SPV), e themeluar për të zhvilluar dhe operuar një projekt për prodhimin e energjisë nga era të quajtur “Flechtdorf”, në bashkinë e Diemelsee në Hessen, Gjermani.

Shoqëria target nuk ka prezencë ligjore dhe nuk realizon të ardhura në Shqipëri.

II. Përqendrimi

Në datë _____ mes shoqërive ABO Wind AG (shitësi); B&F Windpark GmbH (ish Partneri i Përgjithshëm) dhe SK Wind GmbH & Co. KG (blerësi); Statkraft Holding Wind & Solar Deutschland GmbH (Partneri i Përgjithshëm) është nënshkruar “Marrëveshje për blerjen dhe transferimin e aksioneve”.

Objekt i blerjes janë aksionet e shitësit, me të gjitha të drejtat dhe llogaritë ndihmëse të shitësit tek shoqëria ABO Wind WP Flechtdorf GmbH & Co. KG.

Me plotësimin e të gjitha kushteve të përcaktuara në këtë marrëveshje, ku shitësi është i detyruar të njoftojë me shkrim blerësin, shoqëria SK Wind GmbH & Co. KG do të zotërojë 100% të kapitalit në shoqërinë ABO Wind WP Flechtdorf GmbH & Co. KG.

Referuar dokumentacionit të depozituar, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës”, i cili është objekt autorizimi nga Komisioni i Konkurrencës.

III. Analiza e konkurrencës

Në zbatim të nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës do të konsiderohet tregu i prodhimit të energjisë elektrike nga burime jo-konvecionale, por duke qenë se transaksioni nuk do të ketë asnjë ndikim në tregun shqiptar, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar konsiston në përfitim të kontrollit të shoqërisë ABO Wind WP Flechtdorf GmbH & Co. KG nga shoqëria SK Wind GmbH & Co. KG.

SK Wind GmbH & Co. KG zotërohet indirekt nga shoqëria Statkraft AS, shoqëria mëmë e disa filialeve të Grupit Statkraft.

Grupi Statkraft është prezent në Shqipëri përmes dy filialeve të saj, Statkraft Renewables Albania SHPK dhe Devolli Hydropower SHA, të cilët operojnë në tregun e prodhimit të energjisë elektrike nëpërmjet burimeve solare dhe të ujit.

Shoqëria target ABO Wind WP Flechtdorf GmbH & Co.KG ushtron aktivitet në fushën e prodhimit të energjisë se rinovueshme, energjisë së erës dhe nuk është prezente dhe nuk realizon xhiro në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë ndryshim dhe nuk do të ketë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet përfimit të kontrollit të shoqërisë ABO Wind WP Flechtdorf GmbH & Co. KG nga SK Wind GmbH & Co. KG.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.


KOMISIONI I KONKURRENCËS


Leida MATJA

Zv/Kryetar

Rezana KONOMI

2023-
Anëtar

Adriana BERBERI

Anëtar

Durim KRAJA

Anëtar

